

Forskrift om skulefritidsordning for grunnskulen, Bokn kommune, Rogaland

Heimel: Fastsett av Bokn formannskap dato med heimel i Lov om grunnskuleopplæringa og den vidaregåande opplæringa (opplæringslova LOV-2023-06-09-30) § 4-5.

§1 Eigartilhøve

Bokn kommune står som opprettar og eigar av skulefritidsordninga i kommunen. Vedtektene gjeld for den kommunale skulefritidsordninga i Bokn kommune.

Kommunedirektøren kan gjera mindre endringar av vedtektene som ikkje er av prinsipiell karakter.

Formannskapet kan og gjera endringar i vedtektene som ikkje bind kommunen økonomisk ut over desse vedtektene.

Endringar i vedtektene som fører til endra rammer og/eller økonomiske konsekvensar skal avgjerast av kommunestyre.

§2 Kriterium for opptak

Bokn kommune skal ha eit tilbod om skulefritidsordning før og etter skuletid for elevar frå 1.- 4. trinn samt barn med særskilte behov frå 5.- 7. trinn.

Alle som er påmelde innan fristen 1. mars får plass.

Etter at fristen for påmelding har gått ut, får ein plass dersom det er kapasitet. Stadfesting av plass vert sendt ut når det er tildelt plass. Barnet beheld plassen til det er ferdig med 4. trinn eller til plassen vert sagt opp skriftleg og oppseiingstida har gått ut.

§3 Opptaksmynde

Bokn skule har opptaksmynde.

Barnet skal som hovudregel få tilbod om plass på skulefritidsordninga.

Førerett til opptak i prioritert rekkefølga, dersom det må prioriterast:

1. Born med særskilde behov 1.-7. klasse.
2. Yngre born går føre eldre.
3. Born av einslege forsørgjarar.
4. Born som vert følgd opp av integreringstenesta som er for gamle for SFO, men som av ulike årsaker ikkje kan vera heime aleine.

§ 4 Opptaksperiode, oppseiing og endring av plass i skulefritidsordninga

Oppseiingstida av plassen i skulefritidsordninga er to månader frå den 1. i påfølgjande månad. Oppseiinga må være registrert seinast innan utgangen av mai dersom eleven ikkje skal nytte SFO plassen neste skuleår.

Det er bindande påmelding til skulefritidsordninga. Sjølv om barnet ikkje har nytta plassen/byrja i SFO, må plassen seiast opp dersom den ikkje skal nyttast. Dersom ein vil auke opphaldstida, gjeld dette som ei påmelding til anna opphald og opptakskriteriene vert gjeldane.

Ved ledig kapasitet kan skulen avtale å auke opphaldstida med umiddelbar verknad.

Med ynskje om redusert opphaldstid vert det rekna som ei oppseiing av ein del av tilbodet, og reglar for oppseiing gjeld.

§5 Betaling

Betaling for opphald blir etter dei satsar som til ei kvar tid er fastsett av kommunestyret og regulert ved indeksregulering kvar 1. januar.

Betalinga vert fakturert 10 gonger per år. Juli er betalingsfri månad. For føresette med låg inntekt er det redusert foreldrebetaling for elevar i 1. - 4. klasse.

Betalinga skal ikkje overstiga 6 % av samla personal- og kapitalinntekt. Den føresette som søker SFO-plass, vil få faktura og vert ansvarleg for betaling av denne. Dette gjeld også ved delt omsorg.

Det er innført moderasjonsordning med 12 timar gratis SFO for alle påmelde elevar på 1.-3. trinn, og fråtrekk for desse vert automatisk lagt til fråtrekk på faktura. Dersom barnet skal ha leksehjelp som ein del av skulefritidsordninga, skal det ikkje betalast for denne tida etter føresegna i Opplæringslova § 4-4. Det vert gjort fråtrekk i foreldrebetalinga for desse timane etter 1. januar, for hausthalvåret og etter 1.april for vårhalvåret. Etter innføring av 12 timar gratis SFO, gjeld dette fråtrekket for dei borna som har tilbod om fem dagar SFO.

Ved 2 månadar uteståande betaling, vert plassen sagt opp med ein månad skriftleg varsel.

Det er syskenmoderasjon på SFO, det vert gitt 30% frå barn nr. 2.

§ 6 Leike- og opphaldsareal

Skulefritidsordninga bruker skulens samla inne- og uteområde etter avtale med rektor.

§ 7 Dagleg opphaldstid og årleg opningstid

Kommunen har fylgjande tilbod om opphaldstid:

Alle skuledagar (7:00-16:30)

Feriedagar og dagar utanom skuleruta (08:00-15:30)

Full dag 3 dagar (7:00-16:30)

Lang ettermiddag 5 d. (skuleslutt-16:30)

Lang ettermiddag 3 d. (skuleslutt – 16:30)

Kort dag (skuleslutt – 14:30)

Morgen + kortdag (7:00-14:30)

Tilbodet i ferieperiodar kan verta stengt dersom det er færre enn 8 påmelde.
Born med spesielle behov eller familiar med utfordringar i høve til avkorta opningstid i feriar kan søke om utvida tid.
Skulefritidsordninga kan i periodar med få born samordnast med barnehage.
Skulefritidsordninga er stengd i veke 29 til veke 33 kvart år.
SFO startar i veke 33 den dato som skulen startar.
SFO er stengd jul- og nyttårsaftan og onsdag før skjærtorsdag. I tillegg har SFO stengt fem kurs/ planleggingsdagar i løpet av eit skuleår.

§8 Bemanning og leiing

Rektor er ansvarleg for SFO. Det er sett av 20% til administrasjonstid og leiing av SFO. Det kan være inntil 12 barn per voksen i SFO samstundes.

§ 9 Plan og kvalitetsmeldingar for SFO

Det skal fastsetjast årsplan for skulefritidsordninga årleg, denne vert drøfta i skulen sitt samarbeidsutval. Evaluering av tenesta inngår i skulen si kvalitetsmelding.

Planen skal innehalda:

- opningstider/-dagar
- organisering og bemanning
- årsplan - aktivitetar
- samarbeid skule/SFO/barnehage
- foreldresamarbeid

§ 10 Iverksetjing

Forskrifta trer i kraft 15. august 2026